


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-46	Al-Ahqaaf	35	6	Makkiyyah	Ke-66	10



Zaman Diturunkan Surah Dan Latar Belakangnya

Surah al-Ahqaaf besar kemungkinan diturunkan bersama Surah al-Jin di suatu tempat bernama Nakhlah ketika Rasulullah s.a.w. pulang dari Tha'if, peristiwa itu berlaku pada bulan Syawwaal tahun ke-10 Kenabian, 3 tahun sebelum berhijrah ke Madinah. Tuduhan sebagai tukang sihir dan pendusta kepada Rasulullah tersebar dengan meluas pada ketika itu. Dari segi tertib kitabi, Surah al-Ahqaaf merupakan surah yang ketujuh dan yang terakhir daripada rangkaian surah-surah حَوَامِيم (surah-surah yang dimulakan dengan حم).

Kesinambungan Surah Al-Ahqaaf Dengan Surah Sebelum Dan Selepasnya

1. Di dalam Surah al-Jaatsiyah telahpun dijelaskan punca-punca manusia bersikap seperti Fir'aun, sombong, takabbur, cintakan dunia, mempertuhankan nafsu dan lain-lain. Di dalam Surah al-Ahqaaf ini pula dijelaskan sikap negatif kaum 'Aad yang sombong.
2. Di dalam Surah al-Ahqaaf disebutkan tentang kaum yang telah dibinasakan oleh Allah secara langsung, sementara di dalam Surah Muhammad yang merupakan salah satu Surah Madaniyyah umat Islam diperintah supaya berjihad menentang pencerobohan orang-orang Quraisy. Dengan cara begitu Allah kadang-kadang membinasakan orang-orang kafir secara tidak langsung.

Beberapa Kata Kunci Dan Tema Utama Surah

1. Di dalam Surah al-Ahqaaf terdapat tema-tema yang membuktikan kebenaran ajaran tauhid, kekarutan syirik, penjelasan tentang kedudukan dan pangkat kerasulan. Di dalamnya juga terdapat kritikan dan bantahan yang keras terhadap 'aqidah orang-orang Quraisy tentang keperluan adanya wasilah (orang tengah di antara manusia dan tuhan). Selain itu kelemahan tuhan-tuhan selain Allah juga dinyatakan dengan jelas.
2. Surah ini juga termasuk dalam salah satu surah jalaliyyah, di dalamnya tersebut kisah kebinasaan dan kemusnahan kaum 'Aad di Wadi Ahqaaf, di dalamnya juga dikemukakan beberapa sebab bagi kebinasaan sesuatu kaum. Orang-orang musyrikin Mekah ditegur kerana kesyirikan dan kesombongan mereka dan mereka diancam dengan bencana yang telah menimpa kaum 'Aad dan ayat terakhir surah ini mengandungi ancaman kebinasaan dan kemusnahan kepada kaum yang derhaka. (Ayat:35).
3. Manusia dimalukan apabila dikatakan golongan jin lebih baik dari kamu, setelah mereka mendengar al-Qur'an mereka bukan sahaja menjadi orang-orang Islam malah menjadi penda'wah dan pejuang Islam (Ayat: 31).

يَقَوْمَنَا أَجِيبُوا دَاعِيَ اللَّهِ وَآمِنُوا بِهِ، يَغْفِرَ لَكُمْ مِّنْ ذُنُوبِكُمْ وَيُجِرْكُمْ مِّنْ عَذَابٍ أَلِيمٍ ﴿٣١﴾

4. Beberapa keistimewaan al-Qur'an dan seruan tauhidnya.

- (a) Qur'an diturunkan oleh Allah yang Maha Perkasa dan Bijaksana (العزیز الحکیم) (Ayat: 2).
- (b) Orang-orang musyrikin telah menuduh al-Qur'an sebagai sihir yang nyata (سِحْرٌ مُّبِينٌ), mereka juga menuduh Rasulullah s.a.w. telah mengada-adakannya (Ayat: 7).
- (c) Orang-orang musyrikin Mekah telah menganggap seruan al-Qur'an sebagai dusta yang lama (إِفْكٌ قَدِيمٌ) (Ayat: 11).
- (d) Terdapat kesamaan di antara al-Qur'an dan Taurat, kedua-duanya diturunkan sebagai rahmat untuk memimpin manusia (Ayat: 12). Di kalangan Bani Israil ada juga orang yang cerdik, dia meninggalkan agama Yahudi dan memeluk Islam, orang-orang Quraisy pula terus dengan sikap sombongnya (Ayat: 11).

5. Beberapa sikap orang-orang musyrikin Mekah.

- (a) Di dalam surah ini orang-orang musyrikin Mekah dibantah dan `aqidah mereka dirobohkan, mereka dinasihati supaya menerima tauhid seperti golongan jin yang telah menerimanya.
- (b) Orang-orang musyrikin Mekah telah menolak seruan tauhid al-Qur'an dengan berpaling belakang dan tidak mempedulikannya (Ayat: 3).
- (c) Penolakan terhadap syirik dalam bab doa. مِنْ دُونِ اللَّهِ (tuhan-tuhan selain Allah) sampai kiamat tidak akan dapat menjawab seruan dan permintaan manusia kepadanya (Ayat: 5).

وَمَنْ أَضَلُّ مِمَّن يَدْعُوا مِنْ دُونِ اللَّهِ مَنْ لَا يَسْتَجِيبُ لَهُمْ إِلَى يَوْمِ الْقِيَامَةِ وَهُمْ عَنْ دُعَائِهِمْ غَفِلُونَ ﴿٥﴾

- (d) Orang-orang musyrikin Mekah telah menuduh Rasulullah berdusta (Ayat: 8). Sebagai jawabannya dikatakan Nabi s.a.w. bukannya orang yang pertama membawa seruan itu (Ayat: 9). Rasulullah s.a.w. adalah rasul yang terakhir, semua rasul-rasul sebelumnya juga membawa seruan yang sama.
- (e) Doa orang muslim untuk kedua ibu bapanya yang sudah tua dan juga untuk anak-anaknya, reaksi anak yang kafir terhadap kedua ibu bapa. Orang-orang kafir Quraisy diseru supaya meninggalkan pemujaan terhadap nenek moyang dan mereka diminta supaya berfikir dengan `aql yang sejahtera tentang kebenaran seruan tauhid (Ayat: 15 hingga 20).
- (f) Kesombongan dan takabbur adalah penghalang yang paling besar kepada orang-orang musyrikin Mekah memeluk agama Islam dan sebagai balasan kepadanya mereka akan masuk neraka (Ayat: 10).

وَشَهِدَ شَاهِدٌ مِّنْ بَنِي إِسْرَءِيلَ عَلَى مِثْلِهِ فَقَامَ وَاسْتَكْبَرْتُمْ

(Ayat: 20).

فَالْيَوْمَ تُجْزَوْنَ عَذَابَ الْهُونِ بِمَا كُنْتُمْ تَسْتَكْبِرُونَ فِي الْأَرْضِ بِغَيْرِ الْحَقِّ

(g) Kepada orang-orang musyrikin Mekah dikatakan bahawa (قُرْبَانًا إِلَهَةً) iaitu tuhan-tuhan yang mereka sembah dan puja dengan tujuan bertaqarrub kepada Allah dan mereka menganggapnya sebagai perantara dan orang tengah di antara manusia dan tuhan sebenarnya terlalu lemah dan tidak berupaya langsung. Ketika bangsa-bangsa musyrik dibinasakan, قُرْبَانًا إِلَهَةً itu tidak ada pun yang datang membantu (Ayat: 28).

6. Di dalam Surah al-Ahqaaf juga dinyatakan sebab-sebab utama bagi kebinasaan bangsa-bangsa.

(a) Kerana kefasiqan mereka. Dengan menderhakai Allah dan melakukan perbuatan-perbuatan keji yang dilarang Allah, bangsa-bangsa dibinasakan (Ayat: 35).

(b) Orang-orang yang memuja tuhan-tuhan ciptaan mereka sendiri untuk mendekatkan diri kepada tuhan diingatkan bahawa قُرْبَانًا إِلَهَةً mereka itu begitu lemah dan tidak berdaya sehingga pada ketika pemuja-pemujanya dibinasakan mereka langsung tidak dapat menyelamatkannya (Ayat: 28)

(c) Kaum `Aad adalah satu bangsa yang derhaka, mereka tidak mempercayai ayat-ayat Allah, kerana itu mereka dibinasakan dengan angin yang kencang (Ayat: 24).